

## ♥ Sa Coja de Tziu Damus ♥

Su sàbudu a pustis de mèrcuris de cinixu in sa bidda de Simaghis s'aprontat una festa curiosa meda.

Sa Coja de Tziu Damus est una manifestatzioni po ndi torrai a bogai a pillu unu fatu spassiosu. In custa ocasioni su chi si bolit arregordai, mancai a manera brullana, est un'idea de unu cuntzitudinu chi no s'agatat prus e chi, sendi de famìllia pòbora de nàscida, giai chi si depiat cojai e no teniat su dinai po cuncordai sa festa, aiat assentau sa chistioni cun una trassa beni pensada: aiat cumbidau a su sposòriu cosa sua a totu sa populatzioni, bastit chi donniunu s'essit betiu de domu siat sa cadira chi sa cosa de papai. A s'imbressi de su chi si podit pensai, is simaghesus aiat pigau parti etotu a custa festa de coja curiosa.



Comenti s'est giai nau, su fatu est acuntèssiu diaderus, e is provas (is documentus de sa coja) s'agatant allogadas me in is ofitzius de su Comunu de Simaghis.

Sa manifestatzioni duncas ndi torrat a bogai a pillu custa coja curiosa e si spòddiat in custa manera: unas cantu diis primu de sa festa, is chi faint parti de su Consillu de Amministratzioni de sa Pro Loco, a iscùsiu circant a intru de sa populatzioni de Simaghis duas personas chi si nci etint unu pagu a is chi fiant is sposus berus; a pustis, sa dii de sa manifestatzioni, totu si spòddiat comenti de una coja diaderus: in una domu sceberada aposta s'agatant totu is "parentis de su sposu" e in un'àtera totu is "parentis de sa sposa". A sa manifestatzioni podit pigai parti chini si siat, sena de castiai edadi, mascus o fèminas o arratza, s'ùnica cosa est chi tocat a portai bistiris, prendas e àteras cosas de cussus tempus, est a nai is annus '30; sunt proibius a istrintu duncas olieras po su soli, telefoneddus o arrelògius modernus.